



(TRANSMISSION REPORT)

NO.	ANOTHER DATA	HOUR OF BEGINNING	PAGES	RESULT
01	6191300	05JUNE 10:26AM	01	OK

KEN: Rumannan Ricky, Kenneth y Frans Ponson, Management Team
PRODUCTO: General Store Camacuri
INVERSION: 4 pa 5 milyon
APERTURA: Promer di September 2007

Ki ta e concepto di e proyecto 'ki?

Den e ultimo añanan e surtido cu nos ta ofrece na nos clientenan a bira hopi grandi. Un dado momento tur e productionan cu nos kier ofrece y cu ta wordo pidi no ta fit mas den e edificio na Dakota, General Store kier cumpli cu e demanda di pueblo pa mas conveniencia y variedad di producto y servicio. Asina nos a conclui cu no ta keda nos nada otro pa construi un edificio grandi y moderno cu un parkeerplaats amplio. Asina e lugar ta bira mas ideal pa

e contratistanan, cu ta forma un parti grandi di nos clientela, y e publico en general pa haci nan compras cerca nos. E edificio a keda diseña di tal manera cu ora bo dreña bo lo por wak henter e parti paden di e negoshi y surtido di biaha dor cu e rekinan den meymey ta abou anto e resto di rekinan ta mas halto. Esey ta haci tambe cu ta hopi facil pa haya sa unda cada departamento of productionan specifico ta. Pa e shopper cu ta prefera di cana rond y wak tur producto, tin mas espacio pa haci esaki na gusto.

Conta nos con a cuminsa te cu awor?

General Store a habri na 1932 na Oranjestad y den e tempo ey e tabata bende productionan y servicionan relaciona cu electricidad so. Despues a bin un filial na Dakota y na Savaneta y cada bez a keda amplia e surtido di producto na cada filial. E proyecto na Camacuri a cuminsa tres aña pasa. Durante e periodo aki nos a encontra nos mes cu varios cambio cu a haci e proyecto tarda un poco, pero cu na final ta na beneficio di nos cliente.

Algun punto cu ta haci boso proyecto atractivo?

E espacio total di e General Store nobo ta 23.000 pia. Lo tin un seccion di coriente, seccion di plomeria, seccion di hardin y seccion di herment. Tambe unda e edificio nobo ta situa sigur ta atractivo. E ta net dilanti di brandweer na aeropuerto riba caminda grandi. Tin lugar amplio pa staciona auto. Fuera di esaki, lo tin un filial di Subway na e edificio pa ofrece algo saludabel di come y bebe na nos clientenan. Ademá nos lo tin un Customer Services bon informa pa yuda tur cliente cu cualkier pregunta riba producto di General Store of instalacionnan di por ehempel plomeria y coriente.

Cua retonan boso a topa cune?

E retonan mas grandi cu nos a topa cune ta e parti di e diseño di e interior di e edificio, esta e rekinan y distribucion di producto. Nos a traha hunto c'un compania grandi di Merca cu a yuda nos cu esaki. Diferente biaha nos a bay Merca y a mira idea mas mihor cu a haci nos cambia e lay-out di e rekinan na varios momento. Ademá nos mester a adapta e productionan cu nos ta bay ofrece na e Mercado local y nos clientenan pa asina cumpli cu demanda.

Algo cu ningun hende sa di boso proyecto?

Tin varios servicio y otro cos nobo cu General Store Camacuri ta bai bin cune. Kiko esaki ta bai ta, nos ta tene secreto pa tur hende te dos siman prome cu e apertura. Asina ta keda pendiente!

Con hopi famia ta involvi den e proyecto?

General Store ta conoci como un negoshi di famia. Mama, tata y rumannan pa mas cu trinta aña ta traha hunto den e negoshi y ta involvi 100% den tur aspecto di e negoshi. Tur decision y reto nobo ta wordo tuma dor di famia. E proyecto aki ta nada diferente. Hunto nos y e trahadornan di General Store a planea ful e proyecto di A te cu Z y hunto nos a traha pa haci e proyecto aki bira un realidad.

E proyecto ta cla na tempo?

1 di September 2007 lo tin e Grand Opening di General Store Camacuri. Esaki lo tuma lugar en grande na unda tur nos clientenan y e pueblo di Aruba ta wordo invita pa bin celebra. Esaki lo wordo combina cu diferente promocionnan hopi atractivo cu lo wordo anuncia na tempo pa ningun hende perde e evento y oportunidad aki.